




ԱՊՐԻԼՅԱՆ ԵՂԵՌՆԻ ՎԱԹՍՈՒՆՈՒԹԵՐՈՐԴ ՏԱՐԵԼԻՑԻ ՈԳԵԿՈՉՈՒՄԸ ՄԱՅՐ ԱԹՈՌՈՒՄ

Ապրիլի 24, կիրակի.—Յիշատակ բերատոր
նահատակացն մերոց, որք կատարեցան յըն-
թացս Համաշխարհային առաջին պատերապ-
մի.

1915 թ. ապրիլ...

Գարնան ու ծաղկումի այս ամիսը, վաթ-
սունու տարիներ առաջ, լացի ու կոծի ամիս
դարձավ Արևմտյան Հայաստանի ողջ հայու-
թյան համար:

Երիտթուրք կուսակցության պարագլուխնե-
րը, օգտվելով 1915 թ. պատերազմական տա-
րիների իրադրությունից, մեղքը գցելով հա-
յերի վրա, թե իբր նրանք պատրաստվում են
ապստամբության, սկսում են գործի վերածել
իրենց բարբարոս ջարդարարական ծրագիրը,
ծրագիր, որի գապանային իրագործման հա-
մար պահանջվեցին օրեր, ամիսներ... և մեկ
ու կես միլիոն անմեղ ցոխ: Աշխարհում մինչ
այդ կատարված ոճիրներից ամենաողբերգա-
կանն ու մեծագույնը, ամենաանմարդկայինն ու
ամենադաժանը: Ոճիր, որի միակ նպատակն
էր՝ բնաջնջել խաղաղ ու աշխատասեր մի
ժողովրդի, որի արմատները գալիս էին դա-
րերի խորքից, այրել և ոչնչացնել այնպիսի
մի բարձրարժեք մշակույթ, որի հիմնաքարն
էր «ձանաչել ցիմաստություն և վերատ, իմա-
նալ վրանս հանճարոյ»:

Արյունաբոու թշնամին իր «սրբազան»
գործը կատարելու համար այրեց, սրի քաջեց,
խեղդամահ արեց, խաչեց ու ցցի հանեց բյու-
րավոր անմեղ մարդկանց, բայց չարը չհա-
զեցավ: Արյունոտ ձեռքերով դահիճները
իրենց հայրենի գյուղերից ու շենքերից բռնի
տեղահանված հայերին քշում էին դեպի

արևակեղ անապատները, ուր սովն ու ծա-
րավը և բնության դաժան պայմանները ամեն
օր հնձում էին հարյուրավոր ծերերի, կա-
նանց և երեխաների կյանքեր:

Քայլում էին տանջահար «քարավանները»
...քայլում էին դեպի անհայտություն... գնում
էին դեպի անմահություն:

Անցան այդ տարիները: Վերածնված հայ
ժողովուրդը բուժեց անցյալի իր վերքերը, նոր
ուժով և նոր թափով կերտեց ու շենացրեց
իր հայրենիքը՝ փառապանծ Սովետական
Հայաստանը: Հայ ժողովուրդը ապրեց, որով-
հետև, ինչպես իր գոյության բոլոր դարերում,
այնպես էլ այս անգամ «մահուամբ ցմահ
կոխեաց»:

Ապրիլյան այս արևաշունչ գարնանը,
հայ ժողովրդի վաճակները, աշխարհի որ
ծայրում էլ լինեն, նշում են իրենց բազմա-
չարչար նահատակների հիշատակը:

Ժամը 10.30-ին Հայոց Հայրապետը, ու-
ղեկցությամբ Տ. Սիոն, Տ. Ներսես սրբազան-
ների և Մայր Աթոռի երիտասարդ վարդա-
պետների և սարկավագների, այցելում է Ծի-
ծեռնակաբերդ:

Վեհափառ Հայրապետի հետ Ծիծեռնակա-
բերդ են այցելում նաև Հայկական ՍՍՀ Մի-
նիստրների խորհրդին առնթեր Հայ Եկեղե-
ցու գործերի խորհրդի նախագահ Ռուբեն
Պարսամյանը և տեղակալ Անդրանիկ Հաս-
րաթյանը:

Ավտոմեքենաների շարայումը մոտենում
է Եղեռնի պոհերի հիշատակը հավերժացնող
հուշարձան-կոթողին: Վեհափառ Հայրապետի
զխավորությամբ թափորը դանդաղաքայլ մո-

տենում է հուշարձանին: Նորին Սրբությունը և երկու սրբազան հայրերը կարմիր և սպիտակ մեխակներով միահյուսված Քրիստոսի խաչը խորհրդանշող ծաղկեպսակը զետեղում են հուշարձանին: Այնուհետև, կոմիտասյան հոգեպնայլ և խորհրդավոր մեղեդիների հընչյունների ներքո, թափորը շարժվում է դեպի անջեջ կրակը, որտեղ Հայոց Հայրապետի նախագահությամբ կատարվում է հոգեհանգըստյան կարգ՝ նվիրված հայ նահատակների հիշատակին:

Ժամը 11-ին Մայր տաճարում, Ավագ խորանի վրա, ս. պատարագ է մատուցում հոգևոր ճեմարանի փոխտեսուչ Տ. Հայկապոն վարդապետ Նաջարյանը և «Աստուած իմ, Աստուած իմ, ընդէ՛ր թողեր պիս» (Մարկոս ԺԵ 34) բնաբանով սրտառուչ մի քարոզ է խոսում՝ ոգեկոչելով անմոռաց հիշատակը մեր նահատակների: Ապա պատարագիչ հայր սուրբը ընթերցում է համայն հայությանը ուղղյալ Վեհափառ Հայրապետի ուղերձը՝ նվիրված Ապրիլյան եղեռնի զոհերի հիշատակին:

Պատարագի արարողությանը ներկա էին

Մայր Աթոռի ողջ աջխառավորությունն ու հավատացյալների հոծ բազմությունը, որոնք եկել են իրենց գլուխը խոնարհելու հայ նահատակների հիշատակի առաջ:

Հավարտ ս. պատարագի Վեհափառ Հայրապետը եկեղեցական թափորով առաջնորդվում է դեպի մայրավանքի հյուսիսային կողմը, դեպի Եղեռնի զոհերի հիշատակին կառուցված հուշարձան-կոթողը: Հուշարձանի մոտ Նորին Սրբության նախագահությամբ կատարվում է հոգեհանգստյան կարգ:

Ժամը 15.30-ին հոգևոր ճեմարանի սաները, գլխավորությամբ փոխտեսուչ Տ. Հայկապոն վարդապետ Նաջարյանի, մեկնում են Ծիծեռնակաբերդ՝ ծաղիկներ դնելու և գլուխ խոնարհելու Ապրիլյան եղեռնի հուշարձանի առջև:

Երեկոյան ժամը 19-ին, ինչպես ամեն տարի նույն օրը, հանրապետության մեջ հայտարարվում է Լուսինյան րոպե: Ողջ հայությունը մեկ րոպե լռությամբ իր հարգանքն է մատուցում անմեղ զոհերի սուրբ հիշատակին:

